

HUBENTUD DEN MOVECION

Seccion Special Redacta y prepara pa Mercedes Abdul

GRUPO XANADU A CRECE Y AWOR TIN CUATRO AÑA DI EXISTENCIA

Jade Padron, Tzaithil Oduber, Alcides Jackson, Jerney Harms (lider), Bernardo Martinez, Sharlaine Huntington, Chaepy Werleman, Denise Krozendijk, Sharitza Figaroa, Tamarah Croes, Charlie De Groot, Robert Robles, Irvin Robert, Omavra Rincones, ta e nombernan y fam di e hobennan integrante di e tremendo grupo "XANADU", kendenan ta estudiante di school secundario.

Seccion Hubentud den Movecion ta sinti su mes honra di yena un di su paginan cu un entrevista haci na Jerney Harms, lider, hunto cu Jade Padron, kendenan ta conta con "XANADU" a lanta.

Cuanto tempo pasa Xanadu a lanta, y con e idea a nace?

"Dia 22 di december aña 1992, grupo Xanadu a lanta. Prome cu esey e idea a nace tempo cu Grupo Menudo tabata na moda, y ami hunto cu algun amiga a lanta un "fans club".

Nos tabata diez mucha muher cu ta balia y ora cu Menudo tabata bin duna concierto nos tabata haci e show di apertura. Despues cu Menudo a bay foi moda, nos a keda balia un tempo mas. Na dado momento e lidernan di fans club a bay studia afo, y dia cu mi a bay pa reina hubenil di La Cabana, mi a yama mi amiganan bek pa balia cumi, y despues di esey nos a forma e grupo Xanadu".

Cuanto hoben ta integrando e grupo, y cual ta boso meta?

"Actualmente nos ta 14 hoben. Baliaamento ta nos hobbie, y nos ta entrena den nos tempo liber, mas tanto den fin di siman pa no stroba school".

Na cumzamento nos tabata un grupo di baile di mucha muher, pero despues cu nos tabata tin mester di mucha homber pa un baile, a integra na nos grupo 3 mucha homber".

Jade Padron a papia riba e meta: "Nos meta ta pa de-



mostra cu e muchanan hoben por haci algo util y saludable".

Ki plannan Xanadu tin pa aña 1997?

"Awor aki nos no tin hopi plan door cu mayoria di nos nos ta den examen klas. Actualmente tin un contract cu un hotel, riba tur diadomingo, pero nos tin cu dicidi si sigui cune of no. Pero si, nos tin un sorpresa pa e aña aki, pero nos no a bisa nada di dje awor aki". Asina Jerney y Jade a contesta.

Ken ta tras di Xanadu pa duna boso apoyo y estimulo?

"Di mi parti mi por bisa cu mi mayornan ta stimula nos hopi. Mi mama cu mi tata ta haci nos administracion. Ora nos ta bay balia den hotel mi tata ta tuma encargo di

sonido, e ta hiba e pañanan cu nos ta usa, etc.

Pero e mayornan di e otro muchanan tambe mi ta haya ta respalda nos hopi y semper nan ta bay mira nos actua", Jerney a bisa.

Di su parti Jade ta menciona: "Mi ta kere cu e afecto cu nos tin entre nos mes tambe ta importante, pasobra esey ta stimula nos pa sigui den e grupo. Nos ta amigo di otro, nos ta haci hopi actividad hunto, si nos mester sali nos ta bay den grupo".

Di unda e number XANADU a bini?

"E number Xanadu tin un historia largo su tras. E cos ta cu mi ta bay Merca hopi cu vacacion, y aya tin un cas cu yama "Home of the future" cu ta carga como number

"Xanadu".

Tambe tin un disco-tienda, un cine, y un cancion bunita di Olivia Newton John cu yama Xanadu.

Anto e prome diasabra cu nos a bay entrena mi a bay un lugar cu bende mata, hunto cu mi mama, kende ta gusta mata.

Ora mi a bay cana cune mi a gusta un mata y ora mi a puntra con con e yama nan a bisami "Xanadu".

E ora ey mi a bay cas y puntra e otro integrantenan ke hubo si nos ta usa e number ey, ya cu ta un number straño.

Nos tin un amigo mas grandi cu nos cu ta di Merca pero bibando na Aruba, y mi a bay puntre kico Xanadu kiermen. El a splicami cu e no sa di cual idioma e palabra ta bin, pero e kiermen "dance for a better future". E ora ey nos a scoge e number aki pa nos grupo".

Ki tipo di danza boso ta balia mas tanto, y di con?

"Nos ta hopi estilo di jazz. Mayoria di nos, specialmente muchanan muher ta bay ballet, specialmente jazz cu ta un baile cu mayoria di nos ta gusta. Pero tambe nos a siña folklore. Nos bailenan ta hopi varia ya cu nos ta balia merengue, danza arabe cual a gana un premio como mehor show, y entre otro nos ta balia salsa, wals, house, cowboy, pues un tiki di tur cos".

Boso tin pensa di haci e grupo mas grandi?

"Mi ta haya e idea bon, pero mi tata hopi biaha ta aconsehami pa no hacie mucho grandi, pasobra entre mas grandi tin menos control, y ta bira mas dificil pa maneha e grupo.

Awor aki cu nos ta un grupo basta chiquito, nos ta pasa hopi bon hunto y ta mas facil pa guie.

Tin hopi mucha cu a acercanos y nos a crece. Nos a cuminza cu seis bailador, tres a bay afo anto nos a bira tres, y despues nos a crece bek. Ainda tin hopi mucha ta acerca nos pa dreña den e grupo, pero nos ta pensando ki nos ta haci".

Tur di boso ta bayendo school?

"Si. Nos tur ta bayendo school, mayoria ta alumno di Colegio, sea HAVO of VWO (examen klas), tin 3 of 4 na 4de MAVO tambe, tin 2 na MTS. Tin di school tecnico ta traha atardi, of den fin di siman. Pues nos ta hobennan hopi activo", Jerney Harms ta bisa.

Boso tabata tin algun cantante den e grupo?

"Wel, nos a balia un tempo ropic largo cu e cantante infantil Edgen Semeleer. Tabata tin un tempo cu nos no tabata un grupo di baile riba su mes, pero durante un aña nos a acompaña Edgen tur caminda, hasta bay afo cune. Pero for di October aña pasa nos a bira un grupo di baile stabil riba nos mes".

Den bo experiencia como lider, Jerney por bisa nos sinceramente si ta facil, of ta dificil pa maneha e grupo? Tur integrante ta coopera cu otro?

"E ta dificil, mi no por gaña. Mi ta hopi hoben y mi no a studia pa juffrouw di baile ni pa dirigi un grupo. Pues e no ta facil. Tempo cu mi a cuminza mi tata no tabata mucho di acuerdo cune debi cu mi ta bayendo school y el a kere cu mi lo no por a maneha e grupo. Pero mi tabata tin hopi deseo di tin un grupo di baile. E ora ey el a apoyami, y nos a bin cune. Pero e ta hopi bon si bo tin un hende grandi para bo tras como lider. E no ta facil, e ta dificil, specialmente den e edadnan aki. Tin ora bo no ta haya tur hunto den e oranan di entrenamiento, pesey nos a pone un ora vast tur diasabra 6 ora y mey di atardi". Aki Jade ta agrega" debi cu nos ta amigo di otro nos ta haci wega y pasa pret, pero na dado momento nos ta lubida cu ta pa entrena nos a bin. Si ta un presentacion nos tin su dia siguiente nos mester entrena pa bay riba stage. Pero nos ta yuda otro si, y semper nos ta percura pa prepara nos mes bon".